

LI SPI'RITU DE EDGAR DE WAHL

Mult persones ja questionat me: "Dorlota, pro quo tu aprende Interlingue-Occidental? ↳ tu ha fat li connosentie de ti lingue? Pro quo tu aprende un tal ínutil lingue e dissipa tui valorosi témpor per to?"

Customalmen yo responde a tal questiones: "Li lingue es bell e yo ha descovrit li lingue in li internet etc." Ma to es solmen un pezze del veritá. E pro quo yo ne di li veritá? Li response es que nequí va creder me. Ma vu, mi car letores, deve saver li veritá anc it es tant íncredibil e fantastic. Ma vu ja ha aprendet li lingue de Edgar de Wahl. Che vu yo ne deve excusar me por har aprendet ti lingue. Fórsan vu crede ti naration e si ne fórsan it adminim amusa vu.

It es un frigid véspere in li tard hiverne. Li obscur ombre del pandemie ja atendet, ma noi ancor ne savet pri li venient catastrofe. It esset un venerdí e yo joyat que yo ne deve ear al scola ye li sequent die. Ma yo havet mult hem-taches in latin e francesi e volet finir les ja durant li venerdí. Per to li saturdí e li soledí vell esser vermen líber. Líber por incontrar mi max bon amica. Yo ancor ne savet que omnicos va esser diferent.

Pos yo hat finit mi hem-taches yo esset vermen tost fatigat. Yo changeat in mi vestimentes por li nocte e leet un poc. Yo ama leer romantic-horror e fantastic libres. In ti véspere yo leet li libre "Li magical cultelle" de Pullman. It esset li duesim parte in li trilogie "Su obscur materiales". Me tre pleset Lyra Belaqua li heróa del roman. Ella have 12 annus sammen quam yo! E me tre pleset su caréctere e mem li nómine es tre bell. In li roman on posse viagear in altri paralel mundes. Ti pensa fascinat me. Yo ancor ne savet que yo self va decovrir tost un tot nov monde!

Quande yo ja jacet in li lette, mi matre enirat in li chambre por dir bon nocte a me. Yo circumbrassat e basiat la quam un litt infante e ella desirat a me un bon nocte.

Tost yo indormit o adminim yo pensat to. It es profund in li nocte e yo audit un strangi son. Mi chambre esset sur li duesim etage. E li son originat de supra. Alqué grattat súper me. It es un constant son. Esque it es un animale? Yo ne esset cert, ma yo ne posset indormir plu. Esque yo deve avigilar mi genitores? Plutost no, pro que ili vell rider pri me e pensa que yo es ancor un litt infante. "No, to vell esser tro embarassant por me!", yo pensat. "Lass me esser coragosi! Yo va controlar quo fa un tal bruida in li mansarde", yo dit a me, ma si yo es honest yo timet un poc. Yo combattet con me self, ma finalmen li curiositá victet.

Yo levat me ex li calid lette in li frigore del chambre. Yo provat esser piani por ne avigilar mi

genitores e li possibil intrusor in li dom. Yo prendet mi smartfon por haver un poc de lume. Yo eat prudentmen sur li pices de mi fingres pede. E yo es vermen bon in it pro que yo dansa anc ballette audiente ancor li strangi bruida. Esque to esset un avertiment? In un moment del quietesse yo prendet li scaliere adsupra al mansarde. It es vermen quiet e yo posset audir li sifflada del vent in ti obscur e frigid hivernal nocte.

Tande yo intrat li mansarde. It es vermen frigid ta e obscur. Yo iluminat li mansarde per li lampe de mi smartfon. Yo videt mult old coses quam old vestimentes e chestes. Yo ne posset vider ni un person, ni un animal o mem ni un fantom ci. Yo sospirat e ja volet retornar a mi chambre quando subitmen yo audit un crac. Yo esset terribilmen aterret! Panicmen yo iluminat in un grand rapidesse li suol del mansarde. E to esset! Un chest hat se apertet! Qualmen esset to possibil? Li radie de mi lampe restat sur li chest, ma pro mi tremore li lume movet se un poc.

Subitmen un altri lume radiat in li mansarde, ma to ne esset un electric lume. Yo cludet aciecat mi oculos. Yo apertet mi oculos un poc. E to quo yo videt esset incredibil: Crede it o ne it esset li siluette de un mann totmen plongeate in lume! Yo mult terret e strax provat celar me detra un old canapé. Yo regardat prudentman súper li márgine del moble. Li siluette del old mann regardat in mi direction! Yo es paralisat e mem ne posset mover o criar por auxilie.

Con un bass voce il dit: "Salute mi senioretta! Yo es li spiritu de Edgar de Wahl li creator del lingue Occidental! Ples ne timer!"

Esque to es un somnie? Yo dit a il: "Ples ne far alquó a me Seniora! Quo vu vole de me?" Just in ti moment yo comprendet que yo parlat in un altri lingue. Fórsan ti lingue pri quel li fantom parlat. Occidental? Yo nequande audit pri ti lingue. Esque it es sam quam Occitan? Ma quel relation have to a me?

"Mi car puella. Ci in li chest esset celat un de mi libres. Yo peti que tu lee it Dorlota!", li aparation dit con un seriosi voce. "Trova tui destine. Til tost, mi car Dorlota!"

Pos yo audit un clacca. Yo jettat me sur li frigid planc-suol. Subitmen li lume desaparit. Li obscuritá e li silentie retornat in li micri mansarde. Pos du minutes yo ne audaciat mover e lentmen yo levat me. Li fantom hat desaparit, ma apu li chest jacet un blu libre. Yo esset curiosi e aproximat me al libre. Yo comutat li litt lampe de mi smartfon itere. E vermen! It esset un libri pri ti lingue. Yo leet li titul "Okzidental – Die Weltsprache". Yo apertet it. Mi oculos alargat se quando yo videt que li libre contenet un dedication scrit in un ancian manuscrite: "*Por li nov Interlingue-flicca Dorlota. Edgar de Wahl.*"

Li tot afere esset totmen strani. Yo comensat regardar in li libre. E vermen it esset pri un lingue. Yo nequande audit o leet pri it. Pro que yo aprendet in li scola anglesi, francesi e latin yo posset inmediatecomprender li max mult paroles. It semblat esser un lingue quel esset creat de un hom: Edgar de Wahl. Pro to li fantom usat ti nómine! Yo prendet li libre e eat denov in mi chambre.

Yo timet que yo esset tro excitat por indormir. Yo decidet deman serchar in li internet informationes pri ti lingue! Contra mi expectationes yo vermen indormit rapidmen. Adminim yo pensat to pro que subitmen yo esset in un grand jardin in li estive.

Li sol brilliat calidmen e lucidmen. Li ciel esset blu sin nubes. Yo regardat a me self e devet constatar que yo portat un ancian blanc robe con dentelle e con printat flores sur. It esset tre bell. Mi blond capilles esset ligat in du tresses. Yo sentit que yo esset in un tot diferent témpor e monde. Yo comensat ear in li jardin. In li distantie yo posset vider un grand blanc dom. In li jardin esset mult bell flores e quele árbores. Yo decidet ear in li direction del dom. Pos quele minutes yo videt un mann qui sedet a un tabul. Il videt in mi direction e fat signes con li manu.

Qui es to e ú yo es? Yo hesitat. Esque to fórsan es un trapp e esque yo es in dangere? Ma omnicos devet esset un somnie! On nequande es in dangere in un somnie yo dit a me self. In ti casu yo ne videt un cause ne ear al mann avan li dom. Benque yo esset in un somnie yo posset sentir que mi cordie palpitat fortmen e rapidmen.

Quande me aproximat me al mann yo videt que il esset e havet un barbe. Su visage similat al fantom! To deve esser itere Edgar de Wahl. Li oculos del mann regardat fixmen a me e il subridet. Automaticmen yo replicat to per un subride.

"To aspecte bon in ti vestimentes Dorlota! Benevenit in mi jardin!", li mann dit con un simpatic e profund voce. De ú il save mi nómine?

"↳ yo es e qui vu es?", yo questionat confusimen. Il spectet intensivmen a me.

"Li puellas de omni témpores e mundes es vermen curiosi", il rider. "Yo es Edgar De Wahl o plu bon un reflection de il. Noi es in tui pensada benque yo ha penetrat les un poc mi yun senioreta", il respondet.

Yo audit li uceles pipiat. Yo portat un chapel e yo palpebrat pro li sole.

"Quo vu desira de me? Pro quo vu es in mi cap?", yo respondet per un altri question.

"Pro quo tui mente es apert por e por mi lingue Occidental o qualmen it es hodie nominat Interlingue", il replicat e cedet parlar quam il atendet un nov question. Ma yo solmen escutat con apert bocca. Pro que yo ne dit alquó Edgar De Wahl continuat.

"Yo desira o plu bon yo peti te aprender e propagar Occidental. Yo have un grand talent e energie por far to. Qualmen tu va far to, tu save plu bon quam yo. Tu conosse tui témpor e su costumes mult plu bon e ples ne obliviar que yo ja morit ante quam 70 annus", il dit amusat.

"Ma yo parla con me? Qualmen vu posse esser mort Senior De Wahl", yo replicat chocat per li pensa que yo parla con un mort hom. Fórsan to es dangerousi. Yo sentit un crescent timore.

Il ridet e dit: "Ples ne timer mi yun dama! Yo ne es un vampir, zombie o altri maliciosi creatura! Yo vive in un cert sense pro que mi idé es vivent. It esset presc mort, ma ante quelc annus mi lingue esset revivificat e per to anc mi spiritu. Pro plu e plu homes scrir e parlar mi lingue, mi spiritu devenit itere activ. Yo pensa que li homes de tui epoca lee pri it in lor machines calculatori.... "

"Vu vole dir computatores!", yo interruptet le. E il subridet denov a me.

"Yes, to es fórsan li modern expression. E ti machines mem parla. Quel grand possibilitás de communication vu have!", il dit e su oculos splendet. Il sospirat: "In mi témpor noi devet scrit leteres e viagear esset tre desfacil e custosi."

Yo esset totmen confuset. "E si yo refusa vor proposition Senior de Wahl?", yo questionat incertmem. Fórsan nu li fantom va devenir incolerat e menacia me.

Il ridet: "Nequó e yo ne posset far alquó. Yo vell accepter it e bon. Me ples promesser a me que tu adminim regardar in li libre."

Yo inclinat li cap.

"Tu es bon puelle Dorota", il dit a me. "Esque tu vole trincar un té o limonade?"

"No, mersí", yo respondet.

"O antey yo oblivia it. Yo deve advertir te!", il dit e regardat seriusimen a me. Yo esset surprisat e interessat.

"Ples esser caut pri li adherentes del lingue Interlingua. Ti linguach de un asociation con li nómine IALA provat furter mi idé por far un total desfacil e mal lingue ex nor Occidental. Ili provat mortar

Occidental, ma ili ne successat. Ili have pecunia e trahit li idé por crear un international neutral e natural lingue. Il va tentar te! Ples resister ti tentation Dorlota", il dit a me con un inquiet mime.

Subitmen yo audit un cloche. It clocheat decidu vezes.

Edgar De Wahl sospirat: "Regretabilmen nor comun témpor nu fini. It esset un grand plesura e honore por me ha fat tui conossentie Dorlota."

"Quo eveni nu? Esque yo va revider vos Senior de Wahl?" yo criat.

"Fórsan Dorlota. Ma ne oblivia que mi spiritu es in li lingue self! Adío mi yun senioreta!", il respondet e li contures del mann devenit plu e plu inclar. Omnicos comensat vertet circum me. Yo criat e subitmen yo havet li sente que yo cade in un nigri fore. Yo sentit un vertigine e perdit li conscientie. Omnicos devenit nigri e silent.

Yo avigilat me in li lette. Mi vestiment de nocte glutinat a mi córpor. Yo essayat li sudore de mi fronte. Tant strangi somnie!

Ma li sequent yo comensat leer li libre pri Occidental e reserchat in li internet pri ti bell lingue. Mi curiositá devenit plu e plu grand. E yo vermen rapidmen aprendet li lingue. Yo mem renunciat mi max bon amica ye li saturdí.

E tost yo comensat scrir articules in li Interlingue de Wikipedie, traductet frases che Tatoeba e mem continuat un blog. Yo comprendet que yo es li nov Interlingue flicca e que li lingue de Edgar de Wahl ha devenit mi destine. Li spíritu de Edgar De Wahl es desde ti strangi nocte intra me. Fórsan anc vu ja es captet del spíritu sin saver it. Ti lingue es pur energie. Ma ne oblivia su avertiment pri Interlingue e altri lingues queles va tentar te abandonar Occidental. Ples resister li tentation! Obedi al spíritu de Edgar De Wahl.